



Մ ՈՒՐՐ Զ ԱԿՈՐ

ԱՌԱՋՆՈՐԴԱՆԻՍ ԱՄՅՐ ԵՒ ԿԵՂԵՅԻ



ԿԱՐԱՐ ԿՐԱԿՐ

7 ՄԱՅԻՍ 2017

Կիրակնօրեայ Ընթերցումներ էջ 1
Վերանդումը՝ Մանուկներու... էջ 3

ԸՆԹԵՐՑՈՒՄ «ԱՌԱՔԵԱԼՆԵՐՈՒՆ ԳՈՐԾԵՐԸ» ԳԻՐՔԷՆ (13.16-43)

Պօղոս ոտքի ելաւ, ձեռքով նշան ըրաւ որպէսզի լռեն, եւ ըսաւ.

«Ո՛վ իսրայէլացիներ եւ աստուածավախ մարդիկ, մտի՛կ ըրէք: Այս ժողովուրդին՝ Իսրայէլի Աստուածը ընտրեց մեր հայրերը, բազմացուց մեր ժողովուրդը որ Եգիպտոսի մէջ որպէս պանդուխտ կ'ապրէր, եւ իր մեծ զօրութեամբ զանոնք հոնկէ հանեց: Շուրջ քառասուն տարի անապատին մէջ կերակրեց զանոնք: Ապա Քանաան երկրի բնակիչ եօթը ազգերը պարտութեան մատնելով, անոնց երկիրը մեր ժողովուրդին տուաւ որպէս ժառանգութիւն: Այս բոլորը եղան մօտաւորապէս չորս հարիւր յիսուն տարիներու ընթացքին: Այնուհետեւ Դատաւորներ տուաւ անոնց, մինչեւ Սամուէլ մարգարէի ժամանակը, երբ մեր ժողովուրդը թագաւոր ուզեց, եւ Աստուած թագաւոր կարգեց Սաուլը, Կիսի որդին որ Բենիամինի ցեղէն էր, քառասուն տարուան համար: Սաուլըն ետք անոնց վրայ թագաւոր կարգեց Դաւիթը, որուն մասին նաեւ վկայեց, ըսելով.

“Դաւիթը, Յեսսէի Որդին, սրտիս խօսող անձն է, որ ամբողջութեամբ իմ կամքս պիտի կատարէ”:

«Անոր սերունդէն էր որ Աստուած Իսրայէլի տուաւ իր խոստացած Փրկիչը՝ Յիսուսը: Բայց նախքան անոր հրապարակ գալը, Յովհաննէս Իսրայէլի ամբողջ ժողովուրդին կը քարոզէր որ ապաշխարեն եւ մկրտուին: Եւ իր պաշտօնը լրացնելու ժամանակ, Յովհաննէս ըսաւ. “Ո՛վ կը կարծէք զիս: Ես ձեր սպասած անձը չեմ: Ահա ինձմէ վերջ կու գայ անիկա, որուն կօշիկները հանելու իսկ արժանի չեմ ես”:

«Եղբայրներ, Աբրահամեան տոհմի զաւակներ

եւ ձեր մէջ գտնուող աստուածավախ մարդիկ. փրկութեան այս պատգամը Աստուած ձեզի՛ ղրկեց: Որովհետեւ Երուսաղէմի բնակիչները եւ իրենց իշխանները չճանչցան Յիսուսը, եւ զայն դատապարտելով՝ կատարած եղան խօսքը մարգարէներուն որ ամէն Շաբաթ կը կարդային: Եւ թէպէտ մահուան արժանի յանցանք մը չգտան անոր վրայ, սակայն պահանջեցին Պիղատոսէն որ սպաննուի: Երբ անոր մասին բոլոր գրուածները կատարած եղան, զայն խաչէն իջեցուցին եւ գերեզման դրին: Բայց Աստուած զայն մեռելներէն յարուցանեց, եւ Յիսուս բազմաթիւ օրեր երեւցաւ անոնց՝ որոնք իրեն հետ Գալիլիայէն Երուսաղէմ եկած էին, եւ որոնք հիմա իր վկաներն են ժողովուրդին առջեւ: Մենք ալ, ահա, ձեզի կ'աւետենք, թէ Աստուած մեր հայրերուն տուած իր խոստումը կատարեց մեր օրերուն, որ անոնց որդիներն ենք: Այդ խոստումը կատարեց՝ Յիսուսը յարուցանելով, ինչպէս երկրորդ Սաղմոսին մէջ ալ գրուած է.

“Իմ որդիս ես դուն, այսօ՛ր քեզ ծնայ”:

Նոյն այն իրողութիւնը, որ Աստուած զայն մեռելներէն յարուցանեց եւ անիկա այլեւս բնաւ մահ պիտի չտեսնէ, խոստում մըն է՝ մեզի ուղղուած, որովհետեւ Աստուած այսպէս կ'ըսէ.

“Չեզի պիտի տամ այն իսկական օրհնութիւնը որ Դաւիթի խոստացայ”, եւ ինչպէս ուրիշ Սաղմոսի մը մէջ սաղմոսագիրը կ'ըսէ. “Պիտի չթողուս որ բու ծառայիդ մարմինը փտութիւն տեսնէ”:

«Արդ, Դաւիթ իր սերունդին մէջ Աստուծոյ ծառայելէ ետք մեռաւ եւ իր հայրերուն քով թաղուեցաւ, եւ իր մարմինը փտեցաւ: Բայց Աստուած յարուցանեց Յիսուսը, որուն մարմինը փտութիւն չտեսաւ: Ուստի իմացէ՛ք, եղբայրներ, Յիսուսի միջոցաւ մեզքերու թողութիւն կը քարոզուի ձեզի: Ո՛վ որ անոր կը հաւատայ՝ կ'արգարանայ իր բոլոր մեղքերէն, որոնցմէ չկրցաք արդարանալ Մովսէսի Օրէնքին միջոցաւ: Զգո՛յճ եղէք ուրեմն որ ձեր վրայ չգայ այն ինչ որ մարգարէները կ'ըսեն.

“Տեսէ՛ք, ո՛վ արհամարհողներ, զարմացէ՛ք եւ կորսուեցէ՛ք. որովհետեւ ձեր օրերուն այնպիսի

գործ մը պիտի ընեմ, որուն պիտի չհաւատամ, նոյնիսկ երբ մէկը պատմէ ձեզի»»:

Երբ Բառնաբաս ու Պողոս ժողովարանէն դուրս ելան, մարդիկ կ'աղաչէին որ միւս Շաբաթ եւս նոյն նիւթին մասին խօսին: Ժողովուրդին ցրուելէն ետք, բազմաթիւ հրեաներ եւ հրէութեան դարձած բարեպաշտ օտարազգիներ հետեւեցան Պողոսի եւ Բառնաբասի, որոնք անոնց հետ խօսեցան եւ համոզեցին զանոնք որ շարունակեն Աստուծոյ շնորհքին մէջ մնալ:

ԸՆԹԵՐՑՈՒՄ
ՊԵՏՐՈՍ ԱՌԱՔԵԱԼԻ
ԸՆԴՀԱՆՐԱԿԱՆ ԱՌԱՋԻՆ ՆԱՄԱԿԷՆ
(5.1-14)

Երէցնե՛ր, որպէս երիցակից մը որ ձեզի պէս վկայ եմ Քրիստոսի չարչարանքներուն եւ ձեզի հետ ալ մասնակից պիտի ըլլամ գալիք փառքին որ պիտի յայտնուի, կ'աղաչեմ ձեզի. ձեզի վստահուած Աստուծոյ հօտը արածեցէք ո՛չ թէ իբր պարտադրանք կատարելով վերակացութեան ձեր պաշտօնը, այլ կամաւորաբար, ինչպէս Աստուած կ'ուզէ: Ո՛չ թէ դրամի սիրոյն, այլ յօժարութեամբ: Ո՛չ թէ ձեզի վստահուած մարդոց ձեր անձերը պարտադրելով, այլ օրինակ ըլլալով ձեր հօտին. որպէսզի երբ Հովուապետը յայտնուի՝ անթառամ փառքի պսակը ընդունիք:

Նոյնպէս ալ դուք, երիտասարդնե՛ր, հնազա՛նդ եղէք ձերերուն: Բոլորդ ալ խոնարհաբար ծառայեցէք իրարու, որովհետեւ ինչպէս Առակաց Գիրքը կ'ըսէ.

«Աստուած հակառակ է ամբարտաւաններուն, մինչ խոնարհներուն շնորհի կու տայ»:

Հետեւաբար Աստուծոյ հզօր ձեռքին տակ խոնարհեցէք, որպէսզի երբ յարմար ժամանակը գայ՝ ձեզ բարձրացնէ: Զեր բոլոր հոգերը Աստուծոյ ձգեցէք, որովհետեւ ի՛նքը կը հոգայ ձեր մասին:

Արթուն եւ պատրաստ եղէք, որովհետեւ ձեր թշնամին՝ Սատանան առիւծի պէս մոնչելով կը շրջի եւ կլլելու համար մէկը կը փնտռէ: Հաստատուն հաւատքով դէմ դրէք անոր, գիտնալով որ աշխարհի մէջ բոլոր ձեր եղբայրներն ալ նոյն չարչարանքներէն կ'անցնին: Եւ բոլոր շնորհքներու պարգեւիչը՝ Աստուած, որ Քրիստոս Յիսուսի միջոցաւ իր յաւիտեանական փառքին կանչեց ձեզ, նկատի ունենալով որ չափով մը մասնակից եղաք Յիսուսի չարչարանքներուն, պիտի ձեզ կազդուրէ, զօրացնէ եւ ամուր հիմերու վրայ հաստատէ ձեզ: Յաւիտեան ի՛րն են իշխանութիւնն ու փառքը: Ամէն:

Այս հակիրճ նամակը ձեզի գրեցի Սիդուանոսի

ձեռքով – որ ըստ իս մեր հաւատարիմ եղբայրներէն է – որպէսզի քաջալերեմ ձեզ եւ վստահեցնեմ թէ Քրիստոսի չարչարակից ըլլալը Աստուծմէ տրուած իսկական շնորհք մըն է, որ դուք կը վայելէք ապահովաբար: Այստեղ, Բաբելոնի մէջ գտնուող եկեղեցին, որ ձեր ընտրելակիցն է, կ'ողջունէ ձեզ: Նոյնպէս բարեւներ Մարկոսէն, իմ որդիէս: Սիրոյ համբոյրով ողջունեցէք զիրար: Խաղաղութի՛ւն ձեր բոլորին որ Քրիստոս Յիսուսի միացած էք: Ամէն:

ՅԻՍՈՒՍ ՔՐԻՍՏՈՍԻ ԱԻԵՏԱՐԱՆԷՆ
ԸՍՏ ՅՈՎՀԱՆՆԷՍԻ
(5.19-30)

Յիսուս անոնց ըսաւ. «Հաստատ գիտցէք, թէ մարդու Որդին ինք իրմէ ոչինչ կը կատարէ, այլ կը կատարէ միայն այն՝ ինչ որ կը տեսնէ թէ Հայրը կը կատարէ: Որովհետեւ ինչ որ Հայրը կը գործէ, Որդին ալ նոյնը կը գործէ: Հայրը կը սիրէ Որդին եւ անոր ցոյց կու տայ ինչ որ ինք կը կատարէ: Տակաւին ձեր տեսածներէն աւելի սքանչելի գործեր ալ ցոյց պիտի տայ Որդիին, այնպէս որ դուք պիտի զարմանաք: Ինչպէս որ Հայրը մեռելները կը յարուցանէ եւ կեանք կու տայ անոնց, նոյնպէս ալ Որդին կեանք կու տայ անոնց՝ որոնց ինք կ'ուզէ: Եւ Հայրը ոեւէ մէկը չի դատեր, այլ դատելու իշխանութիւնը ամբողջութեամբ յանձնած է իր Որդիին, որպէսզի բոլորն ալ պատուեն Որդին, ինչպէս որ Հայրը կը պատուեն: Ան որ չի պատուեր Որդին, չի պատուեր Հայրը որ գայն զրկած է:

«Հաստատ գիտցէք, ան որ իմ խօսքերս կը լսէ եւ կը հաւատայ անոր որ զիս զրկեց, յաւիտեանական կեանք ունի եւ պիտի չզատապարտուի, որովհետեւ արդէն իսկ մահէն կեանքի անցած է: Վստահ եղէք, ժամանակ կու գայ – եւ արդէն իսկ եկած է – երբ մեռելները Աստուծոյ Որդիին ձայնը պիտի լսեն եւ լսողները պիտի ապրին: Որովհետեւ, ինչպէս որ Հայրը կեանք պարգեւելու զօրութիւնը ունի իր մէջ, այդ զօրութիւնը տուած է նաեւ Որդիին: Նոյնպէս ալ դատելու իշխանութիւնը տուաւ Որդիին, որովհետեւ անիկա մարդու Որդին է: Ուրեմն մի՛ զարմանաք որ ըսի, թէ ահա կու գայ ժամանակը, երբ բոլոր անոնք որոնք գերեզմաններու մէջ են՝ պիտի լսեն անոր ձայնը եւ դուրս գան. անոնք որ բարիք գործած են՝ յարութիւն պիտի առնեն եւ ապրին, իսկ անոնք որ չարիք գործած են՝ յարութիւն պիտի առնեն եւ դատապարտուին: Ես ինձմէ չէ որ կը դատեմ, այլ կը դատեմ այնպէս ինչպէս Հօրմէս կը լսեմ. եւ ուրեմն իմ դատաստանս արդար է, որովհետեւ կը գործադրեմ ո՛չ թէ իմ կամքս, այլ կամքը անոր՝ որ զիս զրկեց»:

**ՎԵՐԱՆՈՐՈՎՄԸ՝
ՄԱՆՈՒԿՆԵՐՈՒ
ԴԱՍՏԻԱՐԱԿԱՌԹԵԱՄԲ**

Թորոս Կոստան, Պապիկյան

Սողոմոն Իմաստուն՝ Հին կտակարանի Ժողովողի գիրքին մէջ ըսած է, «Ոչինչ նոր է արեւուն տակ», հաւանաբար ասիկա ճիշդ է աշխարհի բնակչութեան 20 առ հարիւրին համար որոնք տակաւին ելեկտրականութիւն չունին, սակայն մեզի համար որ Հիւսիսային ամերիկայի մէջ կ'ապրինք, ամէն օր փոփոխութիւն կայ...:

Փոփոխութիւն

Մենք, անձնապէս եւ հաւաքաբար, մաս կը կազմենք այս փոփոխութիւններուն...:

Կարեւոր հարցումը այդ է թէ մեր մասնակցութիւնը այս փոփոխութեան մէջ ենթակայակա՞ն է թէ առարկայական:

Այսինքն, մե՞նք է որ կը պարտադրենք այս փոփոխութիւնը, մենք է որ կը սկսինք փոփոխութիւնը մե՞ր նպատակներուն համար, թէ փոփոխութիւնն է որ կը պարտադրուի մեր վրայ, որովհետեւ սկսուած է ուրիշներու կողմէ, անոնց շահերուն համար:

Իւրաքանչիւր փոփոխութիւն մէկու մը վերանորոգումն է, մէկու մը update-ն է:

Օրինակներ

- Քաղաքական կեանքին մէջ

Ամէն նոր կառավարութիւն կու գայ նաեւ փոխելու, նորոգելու, վերանորոգելու նախորդին կողմէ սկսուած գործ մը, մատնանշելով անոնց թերութիւնները, ըստ իրենց...:

- Բջիջային Հեռախօսի աշխարհին մէջ

+ Ամէն մարդ բջիջային հեռախօս ունի

+ Անոր վրայ կրնանք դնել մեր ամբողջ պատարագը, ժամերգութիւնները: Սակայն հազիւ մի քանի անգամ վերանորոգուած է այս APP-ը:

+ Հազար ու մէկ խաղեր կան, որոնք կը վերանորոգուին շարունակաբար որովհետեւ կ'ուզեն աւելի եւ աւելի գերել գործածողները... ուրեմն իրենց կողմէ պարտադրուած վերանորոգումը կրնայ պատուհաս եւ վնաս ըլլալ ուրիշներու...:

+ Հազար ու մէկ խաղեր կան, որոնք կը վերանորոգուին շարունակաբար որովհետեւ կ'ուզեն աւելի եւ աւելի գերել գործածողները... ուրեմն իրենց կողմէ պարտադրուած վերանորոգումը կրնայ պատուհաս եւ վնաս ըլլալ ուրիշներու...:

ՎԵՐԱՆՈՐՈՎՄԸ՝

Այնքան ատեն որ փոփոխութիւն կայ, եւ ինչպէս նշեցինք որ միշտ կ'այ փոփոխութիւն, միշտ նորոգութեան եւ վերանորոգումի պէտքը կայ: Ինչո՞ւ:

Այո, Աստուած ստեղծեց տիեզերքը եւ սակայն այնքան ատեն որ յաւիտենականութեան մէջ չենք

ապրիր, հակամէտ ենք շեղելու այն նպատակէն որուն համար կանչուած էինք:

Յաւիտենականութեան մէջ վերանորոգումի պէտք չկայ որովհետեւ ամէն ինչ կը գործէ անսխալ, առանց շեղելու այն նպատակէն որուն համար ստեղծուած էր...:

Սակայն այս աշխարհին մէջ որ մենք կ'ապրինք, եւ որովհետեւ այս աշխարհը ոչ դրախտ է, ոչ յաւիտենականութիւն, մնայուն վերանորոգումի պէտք ունինք... որովհետեւ ամէն ինչ բնութեամբ հակամէտ է շեղելու իր նպատակէն եւ կը հիննայ... ազդուելով ժամանակէն եւ ճարածութեան: (Յաւիտենականութեան մէջ, ոչ ժամանակ կայ, ոչ տարածութիւն):

Օրինակներ

- Եթէ ինքնաշարժ մը ունինք կը գործածենք 5, 6, 7 տարի... կը նորոգենք, կը վերանորոգենք, բայց երբ տեսնենք թէ այլեւս իր նպատակին, որ մեզի փոխադրել է, չի ծառայեր պէտք է նոր մը գնենք:

- Եթէ խնձորի ծառերու պարտէզ մը ունինք: Ծառերը, որոնք ստեղծուած են որ պտուղ տան, եթէ չտան, կարելի է պատուաստել ծառ որպէսզի պտուղ տայ սակայն 20-30 տարիներ ետք ծառը այլեւս իր նպատակին պիտի չի ծառայէ եւ ուրեմն պէտք է նոր ծառ տնկել որպէսզի պարտէզը պարտէզ մնայ... եւ շարունակէ պտուղ տալ...:

Համայնքները տարբեր չեն, յիշուած իրավիճակներէն, որովհետեւ ինչպէս Ծառերը կոչուած են պտուղ տալու, եւ ինքնաշարժները շինուած են մարդոց եւ առարկաներու փոխադրութեան համար, նոյնպէս ալ համայնքները ստեղծուած են իրենց անդամներուն ԻՆՔՆՈՒԹԻՒՆԸ պահպանելու համար: Համայնք մը չի կրնար ծառայել նպատակի մը, կոչումի մը, երբ կը պակսի իրեն իր ինքնութեան խարխիւր կամ իր անհատականութեան առանձնայատուկ նկարագիրը:

- Համայնքը ԻՆՔՆՈՒԹԵԱՆ պէտք ունի որպէս խարխիւս, որպէսզի փոթորկոտ ծովին ալիքներուն կարենայ հակազդել եւ շատ չի տարուբերիլ, խորտակումէ փրկուելու համար:

- Ազգ մը եւ համայնք մը ՀՈԳԵԿԱՆ ԵՒ ԲԱՐՈՅԱԿԱՆ ԻՆՔՆՈՒԹԵԱՆ պէտք ունին որովհետեւ երբ ազգի մը կամ համայնքի մը հոգեկան եւ բարոյական ոյժը տկարանայ, ոչ քաղաքական, ոչ ռազմական եւ ոչ նիւթական հարստութիւնը կը փրկէ այդ ազգը կամ համայնքը:

- Եկեղեցւոյ շէնքը կարեւոր է, սակայն նիւթական արժէք ըլլալէ աւելի, շէնքը պէտք է դառնայ գործող հոգեկան ոյժ, բարոյական ուսուցում եւ նկարագրի կազմաւորման ընթացք...:

Եւ ի՞նչ է մեր համայնքին ինքնութիւնը: Մեր

համայնքին ինքնուժխենք մեր ՀԱՅ ՔՐԻՍՏՈՆԵԱՅ ինքնուժխենքն է:

Վերադառնալով վերանորոգումի պարտէզի օրինակին, մեր համայնքին համար ՀԱՅ ՔՐԻՍՏՈՆԵԱՅ ինքնուժխենք ծառեր պէտք է տնկուին...: Սակայն ծառ տնկելը չի՛ բաւեր: Հաւանաբար պէտք է 5 տարիներ սպասել, ջրել, խնամել ծառը որպէսզի սկսի պտուղ տալ... անխնամ թողուած ծառը պտուղ պիտի չտայ, որովհետեւ պիտի որդնոտի...:

Ծառերը ջրելու եւ հող տանելու փոխաբերական իմաստը, մանուկի Դատարակութիւնն է, եւ մենք մեր Սուրբ Յակոբ Կիրակնօրեայ Դպրոցին մէջ այդ կը փորձենք ընել 37-րդ յաջորդական տարին ըլլալով...:

Կիրակնօրեայ Դպրոցին նպատակն է.

Ա. Հայաստանեայց Եկեղեցւոյ դաւանութեան եւ աւանդութեան համաձայն կրօնական դաստիարակութիւն տալ մասնաւորապէս մանուկներուն եւ պատանիներուն, իբրեւ լրացուցիչ մասը ազգային ընդհանուր կրթութեան եւ դաստիարակութեան, եւ ընդհանրապէս ալ չափահասներուն աւանդել քրիստոնէութեան եւ Մայրենի Եկեղեցւոյ վերաբերեալ գիտելիքներ եւ ծանօթութիւններ:

Բ. Այս դաստիարակութեան նպատակն է Հայ ժողովուրդին զաւակները գիտակից ընել իրենց Քրիստոնէական Կրօնքին եւ Մայրենի Եկեղեցւոյն եւ շինել անոնց քաղաքացիական նկարագիրը:

Վերջ ի վերջոյ եթէ մեր Համայնքի Պարտէզին մէջ Հայ Քրիստոնեայ Գիտակցութեամբ ապագայի սերունդ չպատրաստենք, Այն ատեն, որպէս համայնք չենք կրնար մեր ՀԱՅ Քրիստոնեայ նպատակին եւ Հայ Քրիստոնեայ կոչումին հաւատարիմ մնալ: Կրնանք մնալ համայնք, որոշ ժամանակի մը համար, սակայն անխարխիւ, ալիքներուն քմահաճոյքին ձգուած:

Եւ եթէ մեր Հայ Քրիստոնէութիւնը պիտի պահենք եւ մեր համայնքը վերանորոգենք, մեր մանուկները այնպէ՛ս պէտք է դաստիարակել որպէսզի անոնք.

- Սորվին խաչ հանել եւ գիտնան թէ պէտք է ապրին այդ խաչը
- Սորվին Աղօթել եւ աղօթքներ որպէսզի կարենան շողկապել իրենք գիրենք մինչեւ Վարդանանք, Մեսրոպ Մաշտոց եւ Ս. Գրիգոր Լուսաւորիչ
- Գիտնան Հայ Բարքերու եւ կենցաղի մասին եւ մաս դարձնէ զանոնք իր առօրեային:

Մեր մանուկները այնպէ՛ս պէտք է դաստիարակել որպէսզի անոնք.

- Քաջածանօթ ըլլան Հայկական սովորութիւններու
- Կարենան Հայերէն Աստուածաշունչ բանալ եւ կարգալ որպէսզի լիիրաւ մասնակցի Զինուորեալ Եկեղեցւոյ կեանքին

- Գիտնան Հայ Սուրբերու մասին եւ կապի մէջ ըլլայ Յաղթական Եկեղեցւոյ հետ
- Տօնեն Հայկական Տօները...
- Գիտնան թէ ինչի՞ կը հաւատան երբ Հաւատամքը արտասանեն եւ Հաւատով Խոստովանիմը կարդան

Մեր մանուկները այնպէ՛ս պէտք է դաստիարակել որպէսզի անոնք.

- Գիտնան Հայ Եկեղեցւոյ պատմութիւնը որպէսզի գիտնան թէ ուրկէ՛ կու գան եւ ո՞ւր կ'երթան
- Գիտնան Հայ Եկեղեցւոյ Տաղաւար տօները
- Կարենան ունկնդրել եւ մասնակցիլ մեր շարականներու երգեցողութեան:

Մեր մանուկները պէտք է դաստիարակուին այս բոլորով իրենց ` Հայ Քրիստոնեայ Ինքնուժխենք շեշտելու եւ իրենց նկարագիրը կերտելու համար, եւ մենք այս բոլորին է որ կը ձգտինք մեր Կիրակնօրեայ Դպրոցին մէջ:

Այս բոլորին համար է որ 37 տարիներէ ի վեր Խաչվերացէն սկսելով ամէն Կիրակի կը հանդիպինք ժամը 10:30 էն մինչեւ Կէսօրէ հոք ժամը 1:00 խաղեր կը խաղանք, խումբերու կը բաժնուինք եւ լսարանային պահեր կուենանք, երգեր ու շարականներ կը սորվեցնենք, դասարաններու կը բաժնուինք եւ իւրաքանչիւր տարիքի համաձայն ձեռային աշխատանքներ եւ դասեր կ'ընենք, Հայերէնով Կայքէջ ունինք, www.sourphagop.org-ը, ամսաթերթ կը հրատարակենք «Մաշտոցի Արձագանգ»ը եւ այս տարի Մայիս 21-ին կ.ե. ժամը 1:30-ին պիտի ունենանք մեր Ամալներջի հանդէսը որուն բոլորը հրաւիրուած էք: Հոս կ'արժէ յիշել թէ մեր 10 հոգինոց Տնօրէնութեան եւ ուսուցչական կազմին 5 անդամները մեր Կիրակնօրեայ Դպրոցի շրջանաւարտներն են, եւ մենք Մեր Կիրակնօրեայ Դպրոցի վերանորոգման գործընթացը արդէն սկսած ենք:

Այս տարի վերանորոգումի տարի է, սակայն հարցը վերանորոգումը չէ, որովհետեւ վերանորոգումի պէտքը մարդուն հետ կու գայ (it's a given): Հարցը, վերանորոգումի որակը, եղանակը, չափն ու կշիռը ճշգեղն է:

- Ի՞նչ որակով պիտի վերանորոգենք այն ինչ որ ժառանգած ենք
- Ի՞նչ արագութեամբ կրնանք վերանորոգել
- Ի՞նչ եղանակով պիտի վերանորոգենք
- Եւ որչա՞փ ճիգ եւ կարողութիւն պատրաստ ենք տրամադրելու այս վերանորոգման աշխատանքին, մեր Հայ Քրիստոնեայ ապագային համար, որ կը սկսի մեր այսօրուան մանուկներու դաստիարակութեամբ: